

Amarizza

'Nta 'sta brevi stagioni di farfalli
ch'è la vita,
l'ummira di lu to' amuri jittava
friddu di crepusculu
e un filu di chiantu appassionatu
'nna lu me' cori,
agitatu ri ventu di duluri e morti.
Comu gelida marina la me' anima,
friddu cristallu
ciuciato cu' la tramuntana
placava, ognī tantu,
la so' storia 'ngannusa di gioi e turmenti
aspittannu la paci
comu matri ch'aspetta
la so' criatura 'nna lu ventri,
comu sulicu ch'aspetta
lu so' cocciu di furmentu
e senza curaggiu di cunfissarlu
mancu a idda stessa,
odiava ognī attimu
orfanu di li to' pinzeri,
ognī istanti privatu
di la ducizza di li to' carni.

Auguri pi tutti

E veni com'ogn'annu ancora Natali,
‘nna li nostri cuntrati è festa ginirali;
un'aria cchiu' duci di jornu si respira,
luminarii e sampugni quann'è sira.

‘Nna tutti li casi c'è pigna naturali
opuru di plastica e ‘un su’ tradizionali,
beddi addubbatti cu’ baddi e ancileddi,
raramentti pirsepii cu’ li pastureddi.

Vitrini illuminati, c’è Babbu Natali
e tutti ‘nfuscati acquistamu regali.
Chi atmosfera, chi paci celestiali
pi nichi, pi granni, veru è Natali!

Parennu chini di bbona vulunta’
a gara facemu a cu spenni cchiossa’.
Ancora fissarii percio’ nn’accattamu,
ori, pellicci e cellulari regalamu.

Macari ‘mpazzuti a telefonari
la triratesima finemu di sminnari.
Auguri pi tutti: chi semu puntuali!
Ma pi’ quanti ‘nto munnu nun veni Natali?

Stampa e tv, sempri morti ammazzati,
guerri, caristii, picciliddi sfruttati;
pi’ quarchi minutu paremu attristati,
ma cu si nni futti, già’ semu abbituati.

La peddi l'avemu comu li buffi
e di tutti ‘sti guai oramai semu stuffi.

Nenti 'nteressa si c'è sempri guerra,
'nta tutta la terra l'effettu serra.

Mafia, sfruttamentu e prostituzioni,
pedofili, sequestri e puru alluvioni.
Lu munnu va sempri cchiu' a la riversa,
aggiusta 'na cosa e centu nni sbersa.

Pi' cui, cari amici, auguri pi' tutti,
pi' cu è 'nfurcatu e pi' cu si nni futti.
Auguri pi' tutti l'omini armali
e pi' cu 'nta 'sta vita 'un avi Natali.

Autunnu di duluri

Danza un biccheri di plastica 'n terra
e pari un tammureddu chi sona
la sofferenza di lu munnu 'nquinatu;
ciucia forti lu sciloccu
supra l'affanni di la terra,
mentri un celu di chiummu
cchiu' tristi renni la me' anima.
Chi voli la vita di mia
chi sempri mi chiama a lu duluri?
Picchi' c'è sempri un Caronti
ch'ogn'ura purtari mi voli a lu 'nfernlu,
comu unu signatu?
Chi su' li me' attimi di paci
'n cunfrontu a seculi di guerra e di turmenti?
Stancu sugnu e cchiu' 'un cci la fazzu
a cummattiri l'esistenza
sulu contru tuttu
e a Tia 'un pozzu diri la me' pena,
puru la fidi mi manca;
nentri mi duna cunortu,
e chianci lu me' cori perennamenti,
mentri tu, lu me' prossimu, ti nni futti.

Capudannu

Capudannu veni ogn'annu
finu a quannu vivi semu,
Capudannu 'un veni cchiu'
quannu 'nfini scumparemu.

Eccu allura la raggiuni
'nta la notti ch'è finali
picchi' è bbonu festeggiari
finu a jornu ch'è iniziali.

A cavaddu di du' journa
allungannu la baldoria,
nun c'è versu, nun c'è corna
s'un finisci sempr 'n "gloria".

Certu è "giustu" 'ncretiniri
e spumanti sdivacari
pi' l'auguriu d'avveniri
'nta li panzi, cu' manciari.

'St'abbittutini a mia pari,
chi facennu ogn'ura sfrazzi,
nui l'avemu tuttu l'annu
senza mazzi e senza caffi.

Ma si ciò, forsi, è normali
d'abuffarini e scialari,
'un mi pari cosa bbona
di 'na guerra scatinari.

Cu' la scusa di canciari,
l'annu vecchju ricusari
comu tanti guerrigghieri
nni mittemu a mitragghiari.

E a parti ch'un sapemu
soccu porta l'annu novu
siddu avemu cchiu' furtuna
o 'un avemu mancu un ovu,

'un mi pari tantu esattu
di sparari e fari botti,
sparapauli cu' mascuna,
chi procuranu la morti.

Fannu cronaca a tappitu
ogni annu li giornali
e nni dannu di 'ssa guerra
bollettinu generali.

Ora dicu a tutti quanti
acquistarisi la morti
è pazzia bella e bbona
pi' canciarisi la sorti.

Sulu l'omu ch'è minchiuni
nni continua 'ssa canzuna:
spara a un vecchju c'un cannuni
pi' sperari cchiù furtuna.

Carnivali

Mentri lu munnu interu
cunzatu è malamenti,
la genti è propiu veru,
‘un si nni futti nenti.
Lu carnivali ‘mpazza
‘nte strati c’è la banna;
o vili stirpi pazza,
‘un sa’ la to’ cunnanna?
Pi’ setti jorna interi
firria gira e canta.
Mariti cu’ mugghieri
e fudda cci n’è tanta.
Scurdati su’ li debbiti,
quarchi bedda farfalla,
facennu ognura strepiti
si spassa sciala e abballa.
Lu pisci di lu mari
si mancia e ‘un è cchiu’ bbonu;
si sta sempri a danzari
anchi si nun c’è sonu.
Lu sfiziu dura pocu:
si curri e cci s’affanna,
si duna ogn’annu focu
au nannu cu’ la nanna.
Cci arrestanu li cinniri,
quarchi faidda vola:
‘un sannu soccu sbinniri
e nuddu li cunzola.
Nuddu cci apri l’occhi,
cci dici veramenti,
populi foddi e locchi,
chianciti amaramenti.

‘Nta l’alta atmosfera
c’è un bucu di l’ozonu:
com’è ch’è sempri fera,
lu tempu è sempri bbonu?
Com’è ch’è sempri spassu,
baldoria e mascarati,
c’è sempri gran fracassu
gridanu ‘nfervorati?
L’acqua cchiu’ rinfrescanti
di ciumi e di lu mari
è china d’inquinanti,
‘un si po’ cchiu’ campari.
Machini longhi e grossi,
cci manca lu posteggiu,
tutti su’ pezzi grossi,
anchi senza sorteggiu.
L’aria di li metropoli
o di’ citta’ cchiu’ nichi,
affuca tanti populi:
‘un criscinu cchiu’ spichi.
Chernobil è gia’ scurdatu,
‘sta cosa è gravi diri,
‘un penzi cchiu’ au passatu,
ma mancu all’avveniri.
In ogni tempu svagu,
divirtimenti e lazzi:
pi cogghiri ‘stu spagu,
si fannu cosi’i pazzi.
Chi munnu cci lassamu
a tutti i nostri figghi?
È ura chi pinzamu
a’ guai e ‘sti cavigghi.
Omu sdisonoratu,
gia’ re di la natura,
distruggi lu criatu,
nun sa’ la to’ svintura?
S’abbruci la foresta
di l’Australia a l’Africa,

viri soccu t'arresta:
mancu 'na tinta rarica.
L'atomica di pruvuli
chi a Hiroscima fici
scumpariri lu suli
e tutti cosi sfici,
nenti è a lu cunfrontu
di plastica e vileni
chi nni mittemu a contu
'nta l'acqua e li tirreni.
Mi riferisci e dicu
anchi a l'effettu serra
chi sciogghi 'u ghiacciu anticu,
disertu fa la terra.
E tu 'un po' certu crìriri
chi su' posti luntani,
comu nun ti po' illudiri
chi su' palori vani.
Si scippi la foresta
anchi di l'Amazzonia,
chiuri la bedda festa,
finisci a babilonia.
Scumparinu li nuvuli,
o chiovi cchiu' a tempesta,
s'asciucanu li pruvuli,
la siccita' n'arresta.
E autri fatti gravi
ti vogghiu ancora diri:
mentri chi tu abballavi
c'è genti chi nun riri.
'Nta tutti i cuntinenti,
scheletri cu' piddami,
supportanu li stenti
e morinu di fami.
Penzu a 'ddi picciliddi,
un jornu a l'autru appressu,
chi speranu pur'iddi,
ma 'u sonu è sempri 'u stessu.

Hannu lu cori 'nfrantu,
ieri, oggi, dumani,
s'impertranu di chiantu
picchì 'un hannu pani.
Lu sa' chi li benessiri
ch'avemu tuttu l'annu
a spisi su' di 'dd'essiri
chi hannu sempri affannu?
Lu sai o fa lu gnorri,
lu struzzu o l'indianu,
chi tantu chi nn'occorri,
nni veni di luntanu?
Sona 'nta ll'aria a mortu
campana in luntananza,
nni crisci lu scunfortu
assemi cu' la panza.
Iu stessu cca chi scrivu,
cumrossu e scunzulatu,
ancora sugnu vivu,
sia puru abbifficatu.
Picchì cu' tuttu chiddu
ch'ogni jornu suvecchia,
campassi un picciriddu
e puru 'n'autra vecchia.
Ma mentri spardu 'nchiostru
'm mezzu a la suffirezza,
mi crisci 'm pettu un mostru
ch'è figghiu di 'mpotenza.
Scumparsu è l'ideali,
'un sacciu soccu fari;
mi sentu un carnivalu,
mi limitu a campari.
O megghiu scrivu a monitu
pi' tutti quanti e mia:
'un fari cchiu' a lu solitu,
opuru è... fitinzia.
Forsi 'sti tinti versi
'un servirannu a nenti,

li sintimenti persi
'nzemmula a l'autra genti.
Dumanì è 'n autru jornu,
ancora 'un è finita,
anchi si nn'haiu scornu
continua la partita.
Comu finisci 'un sacciu,
'un sacciu lu dumani,
vivu 'stu cannovacciu
cu' pupi e tabbarani.